

朝鮮史略

新

書

大

學

堂

藏

書

目

錄

朝鮮史略卷之三

高麗紀

太祖神聖王

十九年

後晉高祖天福元年

甄萱請討賊子神劍王與萱

親率三軍趨天安進次一善神劍率文武官僚

出降得逆臣能與數罪誅之以神劍爲人所脅

且歸命乞罪特原之萱憂懣發疽死於黃山佛

舍王入後百濟都城流良劍龍劍於眞州尋殺

之授萱壻朴英規爵佐丞

英規嘗與其妻議請降兼慰萱

王自制政誠及誠百僚書頒中外以勵臣子節義

二十年西天竺僧來王備兩街威儀法駕迎之始行後晉年號

耽羅國太子末老來朝賜星主王子爵

二十二年佐丞龔直卒直燕山昧谷人有勇略新羅末爲本邑將軍見時方亂投後百濟甄萱以其二子直達金舒及一女爲質直知萱無道必亡就與其子直達諭以歸附高麗之意直達

喜而勉之直遂與其子英舒來朝王拜大相萱
怒收直達及弟妹烙斷股筋直達死及百濟滅
金舒得還至是直卒謚奉義

二十三年初定役分田

自朝臣至軍士勿論官
階視人性行善惡功勞

大小給
之有差

改諸州郡號以慶州爲大都督府

大匡庾黔弼卒黔弼平州人以將略仕太祖凡
出征受命卽行不宿於家嘗被讒流鵠島後上
書召還運州之役甄萱詐要和親黔弼獨以爲

不可不戰乃以勁騎數千突擊之熊津以北望風自降又爲征南將軍遇神劍於槎灘百濟軍不戰自潰及卒謚忠節

二十四年契丹遣使來歸橐駝五十匹王以契丹嘗與渤海連和一朝殄滅此爲無道之國流

其使於海島繫橐駝萬夫橋下皆餓死

史臣曰契丹之

失信於渤海何與於我而爲渤海報復自是邊釁日深貽謀之失可勝嘆哉

二十六年王製訓要十條以訓後嗣

史臣曰麗祖始一三

韓創業垂統宜往來古先哲王貽謀燕翼之道垂憲萬世可也今作訓要其條凡十而一則曰

奉佛二則曰創寺丁寧反復乎燃燈八關山水地理之說從諫遠讒輕徭薄賦儆戒無虞故居其末欲以此而訓後世其可乎

王薨

壽六十七
葬顯陵

太子卽位遺命喪葬悉從儉約

以神惠王后柳氏祔葬

史臣曰太祖御下以寬待人以誠甄萱父子相

夷則伐而取之金傳君臣來附則禮以待之契丹侵滅與國則絕之渤海失地無歸則撫之屢幸西京以爲根本之地親巡北郡以鎮獷悍之俗草創更始雖未遑於禮樂其規模遠略深仁厚澤固已培養五百年之國脉矣

惠宗義恭王

諱武字承乾母吳氏

元年

後晉出帝開運元年

平章事崔彥撝卒彥撝新羅人

自少能文十八入唐登第四十二還國拜瑞書院學士新羅歸附太祖命爲太子師委以文翰之任謚文英其子光胤以賓貢進士入晉遊學流星犯紫微

大匡王規謀立廣州院君

太祖納規女生院君

將行大逆

崔知夢奏將有變宜移御王潛徙重光殿得免

亦不罪規

史臣曰太祖不知規之匪人付托孤君弱臣強之端已兆於此若康兆資謙仲夫義

方之徒接迹於世而忠獻一家四世專擅仁俊林衍日新相繼跋扈由其不能謹之於始也

王以長公主妻弟昭公主從母姓稱皇甫氏

臣史

曰取妻不取同姓
禮也况至親乎

二年王薨於重光殿弟堯卽位誅逆臣王規及

其黨三百餘人王器度恢弘從征百濟有功然

自經王規之亂多所疑忌喜怒無常內外嗟怨

定宗文明王

諱堯字義天太祖第二子母神明王后劉氏

元年

開運三年

王奉佛舍利步至開國寺安焉

二年始置光軍司

初崔彥撝之子光胤以賓貢入晉爲契丹所虜以才見用

知契丹將侵我爲書報之
故選軍三十萬號光軍

始行後漢年號

四年大臣王式廉卒式廉太祖從弟也以勤恪久鎮西京定王規之亂及卒謚威靜

王薨弟昭受禪立王信圖識將移都西京大營官室怨讎胥興

光宗大成王

諱昭字日華

元年

後周太祖廣順元年

大風拔木王問禳災之術司天

奏曰莫如修德自是常讀貞觀政要

史臣曰光宗之治止

於光宗而已者豈不由於法唐宗不法帝王而然歟

二年始行後周年號命翰林學士雙翼

翼周人隨冊命

使薛文遇而來病留上表請爲僚屬遂擢用其父哲聞冀有寵亦來知貢舉試以

詩賦頌及時務策自此文風乃興然冀倡以浮華之文貽弊後世

命有司按檢奴婢推辨是非奴多背主陵上

十一年

宋太祖建隆元年

定百官公服

元尹以上紫衫中壇卿以上丹

衫都航卿以上緋衫小主簿以上綠衫

評農書史權信譖大相俊弘佐丞王同等貶之自是奴訴其主子讒父母罔罔常濫別置假獄

人人畏懼莫敢偶語

十四年

宋乾德元年

始行宋年號

內議令徐弼卒弼利川人性通敏始以吏事進
王嘗賜金酒器弼不受曰服用明等衰奢儉關
理亂臣用金器君將何用時王禮重投化唐人
擇臣僚第宅與之弼奏曰臣居第稍寬願獻焉
王問其故對曰今投化唐人擇屋而處世臣故
家反多失所臣愚誠爲子孫計及臣之存請取
之庶無後悔王感悟不復奪臣僚第宅又內廐

馬死王欲罪主者弼引孔子不問馬之說以爭主者得免其謬諤類此謚貞敏

二十六年王薨王聰明聽斷始可與有爲而猜復日深邪佞得志誅夷骨肉屠害將相衆心離解斲喪邦本雖有文雅之美不足稱也太子卽位還流竄減租調毀假獄焚讒書中外大悅

景宗獻和王

諱仙字長民

元年

宋太平興國元年

禁擅殺復讐

先朝被讒人子孫復讐擅殺故禁之

始定職散官各品田柴科

客星犯帝座

內議令崔知夢奏願戒宿衛

王承等謀逆伏誅

六年王稱疾留內禪於堂弟開寧君治薨於正寢王初鑒前王之失焚讒書雪寃獄遽厭萬幾沉溺聲色昵近小人疎遠君子政教衰替

成宗文懿王

諱治字溫古太祖孫

元年

太平興國七年

改官號

以內議省爲內史門下廣評省爲御事都省

令京官五品以上各上封事論時政得失上柱國崔承老上書論列祖宗行事之美惡以及時

君政治之得失皆指斥無隱承老盖見王可與有爲故進此書未幾拜門下侍郎平章事

二年春正月王祈穀於園丘

祈穀籍田始此

始置十二牧

始定三省六曹七寺

始臨軒覆試進士

新定五服給假式

斬衰齊衰三年給百日齊衰期年給三十日大功九月給

二十日小功五月給十五日總麻三月給七日

六年內史令崔知夢卒知夢幼名聰進性清儉

慈和聰敏博涉經史尤精於天文卜筮太祖聞其名召使占夢得吉兆曰必統御三韓太祖喜改名知夢及卽位入侍禁中惠宗授司天職定宗賴先機奏變誅王規嘗從光宗幸寺被酒失禮貶隈傑縣令景宗召還授內議令王卽位加左執政守內史今年八十二卒謚敏休

置十二牧經學醫學博士各一員

宋遣禮部侍郎呂端來冊王爵

始定五廟

守侍中崔承老卒承老慶州人性聰敏好學善屬文年十二太祖召見使讀論語嘉之自是委以文柄盡忠累代拜侍中封清河侯年六十三卒謚文貞

置修書院於西京令諸生抄書史籍藏之

始立社稷

教略曰社土地之主也地廣不可盡敬故封土爲社以報功也稷五穀之

長也穀多不可徧祭故立稷神以祭之自聖祖至累朝未置夏松之祀尚虧周粟之禋其令羣

工擇地置壇

流郁於泗水縣

郁太祖第八子烝景宗妃皇甫氏王知之乃流於外妃生一子